

COLLECTIVITE TERRITORIALE DE CORSE

ASSEMBLEE DE CORSE

2EME SESSION ORDINAIRE POUR 2012

REUNION DES 8 ET 9 NOVEMBRE

N° 2012/O2/062

**DUMANDA A BOCCA POSTA DA Mme Mattea LACAVE
A NOME DI « FEMU A CORSICA »**

OGETTU : Crèditi Insignamentu Superiore è Ricerca

O Sgiò Presidente!

U bugettu supplementariu vutatu di settembre palesa una callata di circa dece milioni d'euri per u settore di l'insignamentu superiore è di a ricerca. Mancherebbenu 6,5m per l'insignamentu stessu, 2,5m per a ricerca è 1m per e borse.

Capite bè ch'í simu, in un primu tempu, surprisi di sta dimarchja, quandu per un dettu, u governu face di a furmazione è di l'insignamentu una priurità. È ch'í ,in un secondu tempu, simu veramente inchieti di pettu à e conseguenze ch'í seranu generate da sta decisione ch'ùn si pò manc' appena capí!

Di memoria ci vole à ricullà à u 2006 per vede una callata di i crediti cusí impurtante.

Ci pare à noi ch'è dipoi dui anni a vostra vulintà era di fà di a custruzione d'una sucetà di a cunniscenza una priurità.

Oghje ch'í ghjè oghje ci pudete accertà ch'í ste tagliate in u bugettu ùn averanu nisune conseguenze nantu à u campu di e furmazione superiore è di a ricerca?

Stu campu porta in sè l'ambizione d'una Strategia Regiunale di l'Innuvazione ch'í ci hà da permette di riflette megliu à a programmazione à vene per u 2014-2020.

Sapemu ch'í avete allargatu di manera cunsiderevule u vostru perimetru d'intervenzione creendu l'arnesi d'una governanza sparta cù u Cunitatu Cunsultativu di l'Insignamentu Superiore è di a Ricerca.

A dumanda ch'è noi femu avà hè di sapè s'ella hè pussibile di piantà st'andatura, pruvuchendu un blucchime tutale è irremediabile di l'istituzione concunata, è di e pulitiche chì ci site chjaramente impegnatu?

Qualesse sò e strutture ch'anu da pate à u più, o in prima, di sta situazione di rincullu storicu? Di ste tagliate arbitrarie?

Serà l'IUFM, locu di furmazione di i maestri? Sarà l'IUT?

Saranu l'Istituti di Furmazione in Cura Infirmieri di i nostri dui ospidali? O l'altre furmazione sanitarie è suciale messe in ballu da pocu?

Sarà u sistema d'amparera superiore, quellu chì inserisce più di 90% di i so studenti ?

Saranu tocchi direttamente i studenti per via di e borse ch'elli devenu percepí à titulu di u meritu o di criteri suciali ?

Sapemu, perchè elli s'indirizzanu à noi, chì parechji studenti ùn anu toccu e so borse, quand'ella si cunnosce a situazione di crisa oghje, si pò imaginà senza difficoltà e cunsequenze ch'ellu pò avè un ritardu ind'i pagamenti!

Si sà dinù, chì l'Università ùn hà mancu ricevutu per avà a meità di i crediti chì a Cullettività s'era indiatu à dà! I centri ospidaleri di Bastia è Aiacciu cunnoscenu listessa situazione !

Mi pare quantunque chì l'Università partecipeghja di manera attiva à a messa in ballu di e pulitiche di a CTC. Pigliu per esempiu tutta a riflessione nantu à u PADDUC è omu sà chì i so prugetti custruiti cù i servizii territoriali impediscenu di manera regolare à a CTC, d'esse scartata da i finanziamenti europei cum'è u FEDER. Ciò ch'elli chjamanu u "desempegnu d'uffiziu" da u Prugramma Operazionale 2007-2013

O Sgiò Presidente, a vi dicu franc'è chjara, ch'ella sarebbe incuncepibile per noi, di truvacci in a situazione di u 2006, induve u Prefettu avia impostu à a Cullettività d'onurà i so indiamenti finanziari!

Speru chì sta situazione hà da evulà in furia perchè ghjè a cridibilità di a nostra cullettività, a decentralizzazione chì hè messa in causa custí.

À l'ora di l'assise di a furmazione,, di quelle di l'insignamentu superiore, di a presa di cuscenza chì a furmazione di l'omi hè a sfida di i prossimi anni, ùn si pò concepí ch'un tale settore sia indebbulitu à u pianu finanziariu, è chì a CTC, ancu s'ella si pò capí ch'ella appia da fà risparmi, metti a male, o in difficoltà un settore indispensabile à a custruzione di u nostru avvene.

10 milioni d'euri ùn sò micca nunda, allora o Sgiò Presiente a mo dumanda serà più ch'è semplice: chì cuntate di fà per chì u serviziu di l'Insignamentu superiore è di a ricerca ritrovi l'assise finanziaria necessaria à u so bonu funzionamentu quant'è à a so evoluzione indispensabile à a custruzione d'una sucetà di competenze messe à u serviziu di u cullettivu.? Sariate prontu à fà una mudificazione per rimedià à sta situazione ?

À ringrazià vi!